

La Quotidiana 10-6-2016, p. 2

■ FRACZIUN PCD

Prendì enconuschientscha dal quint chantunal

(cp) La fracziun da la Partida cristiandemocratica (pcd) en il cussegl grond grischun è sa radunada dacurt – sut il presidi da *Marcus Caduff* – en il Center sursilvan d'agricultura a Mustér per sa preparar per la sessiun da zercladur.

Il president da la cumissiun da gestiun, *Livio Zanetti*, ha constatà ch'il quint dal chantun per 2015 serra cun in gudogn da 16,7 milliuns. La fracziun ha prendì enconuschientscha da quai. Malgrà il bun resultat constatescha la regenza che las aspectativas daventian mendras per l'avegnir. Ella ha aschuntà – en connex cun il quint chantunal – era ses program ed il plan da finanzas per 2017 fin 2020 e lascha savair co ch'ella vul cuntanscher in tegnairchasa gulivà.

Plinavant ha la fracziun prendì notizia dal rapport pertutgant la finanziaziun da spitals e tgira. Ils represchentants da las vischnancas han crititgà che quella finanziaziun haja grondas consequenzas per ellas. Tuttina sustegna la fracziun da la pcd parzialmain da princip las mesiras proponidas sco quai che *Hans Geisseler* ha preschentà.

La fracziun stat davos la proposta da *Silvia Casutt-Derungs* d'incaricar la regenza d'examinar schebain l'uffizi per natira ed ambient na duessia betg vegnir integrà en il departament d'economia e socialesser. Ins spetgia da quai ina meglra coordinaziun e simplificaziun.

Er è la fracziun per la proposta Stiffler pertutgant WLAN en il spazi public. Qua tras vegnia correspundì als basegns dal turissem. En bleras vischnancas n'è la prestaziun minimala da l'internet tenor lescha na cuntanschida. L'extensiun dals hotspots turistics n'astgia betg succeder sin cust d'ina colliaziun d'internet en l'entir chantun. La pcd s'engascha per bunas colliaziuns d'internet en tuttias regions dal pajais.